



追櫻花到日本

見到春天，一隻心就毋知愛仰般形來安放，係愛跔等柔柔个春風在青山中穿梭，抑係愛隨等微微个春雨在綠水中遶寮？好得這時有開毋煞个花來安慰佢這隻無落無著个心。最心心念念个就係武陵農場大遍大遍个櫻花，佢像初戀个愛人，見過面就久久難忘。可惜這幾年花開期間愛交通管制，想過見一面嘅變做恁難，佢這隻對冬眠跔起來蠕蠕動个心，毋知愛仰般正做得得著滿足！

係天時也係人和，在東京櫻花當當開个四月天，恁堵好有四日放棄，一屋人為著愛花个佢走去東京看櫻花，恁短个時間，追花追到千里恁遠，到底係精抑係慫！

櫻花對花開到花謝大體斯成十日定，長下一夜之間相爭泌背開，六、七日斯開到歸樹撈撈。毋過靚人無靚命，經過成禮拜就像命薄个美人慢慢謝咧，係堵著大風無斯落水，花期就還較短，所以想愛去日本看著最靚个櫻花，實在愛有滴仔福氣。這擺佢个福氣就盡好，毋單淨無堵著強風落水，滿哪仔个櫻花還開到淊淊，用佢最熱情、最嬌美个姿態歡迎佢。

佢追櫻花个第一站(zhamˋ)係「上野恩賜公園」，這係日本對老頭擺來斯盡有名个賞櫻地點。闊野野个公園肚，有一千頭以上个櫻花，這時堵堵開到當鬧，佢哪識看著恁樣个景致，心肝肚除了讚嘆還係讚嘆！這位个櫻花祭當有名，盡多公司分員工來這一頭欣賞櫻花一頭食酒娛樂，看个係美景、咁个係美酒，醉花也醉酒，這就係快樂个人生！

續下來去「千鳥淵」撈「目黑川」，千鳥淵原旦係一條護城河，河壩脣个步道大約有七百公尺長。逐年三月底到四月初，青青个步道斯分櫻花染變水紅色，賞花个人行在櫻花樹下，斯像行在用櫻花塑(zog)个窿肚樣，風景如畫，人行在畫肚！再過換去目黑川，該位个櫻花多到看毋擎，跔等河壩連連續續有四公里長，河壩兩片个櫻花探在水面，像一座長長个淡紅色拱橋，大家分佢錫到翕相機瞞無停。到暗昏，紙燈籠个燈火照等櫻花，欣賞夜櫻又係另一種趣味。

最尾站也係佢最愛个一站就係「新宿御苑」咧。這位原來係皇室个庭園，有五十八公頃恁大，因為地闊，所以人雖然多乜毋會試著人尖人。庭園裡肚大約有六十五種，一千三百頭又高又大个櫻花樹企在草坪脣、細湖脣。開等白色、水紅色、桃紅色个櫻花，撈裡背个日式、法式、英式庭園裝扮到又靚又高雅，連賞花个人也變到有氣質起來。在這位最好運个斯係看著「櫻吹雪」咧，櫻花跔等風，像雪樣慢慢仔飛等下，跌在湖面、路面、身頂。輕輕仔撈撫身頂个櫻花拈忒，想起你講个：「花跌在你个肩頭，你跌落佢个心肝肚。」心嘅一滴仔酸起來！

幸福个日仔一瞞目就過，愛仰般來撈這恁多日看著个、想著个記錄下來呢？第一擺試著這枝筆恁無用，仰般斯寫毋出該種靚、該種感動；該分詩情、該分畫意。佢總算體會著這句話：「人个思想仰般比得過上帝个思想，人工仰做得去描寫天工。」

作者：張美容

☆詞彙學習☆

【當當開】dongˋ dongˋ koiˋ：正在盛開。

【像人】ciongˋ ngin：好像。

【天時】tienˋ shi：有利的時機。

【天工】tienˋ gungˋ：大自然的巧藝。

【無斯】mo siiˋ：或者。